

Pretendì egualitad en ils gremis directivs

L'elecziun dad in um sco secretari general da la Lia Rumantscha sveglia malaveglia

ANDREAS CADONAU/FMR

■ **La tscherna dad in um al timun operativ da la Lia Rumantscha ha leventà la malaveglia da bleras dunnas ch'èn sa drizzadas en ina brev a la publicitad. En la brev pretendan ellas egualitad da la schlattaina al timun da la uniun tetgala rumantscha ed ina proxima presidenta per la Lia Rumantscha.** *Viola Cadruvi* è satisfatga dal resun vers sia reacziun sin l'elecziun dal nov secretari general da la Lia Rumantscha, *Diego Deplazes*. Betg *Diego Deplazes* sco persuna ha leventà la malaveglia da la giuvna dunna rumantscha, ma bain il fatg che la suprastanza da la Lia Rumantscha ha preferì in um enstagl dad eleger ina dunna al timun operativ da la LR. «Tant pli perquai che dunnas qualificadas èn stadas en l'elecziun.» La brev formulada da *Viola Cadruvi* è publicada sin ina plattafurma digitala cun cleras pretensiun vers la Lia da finalmain cuntanscher l'egualitad da las schlattainas en ses gremis directivs. La brev publicada oz sin la Tavla naira da la LQ ha chattà in grond resun. Almain 77 dunnas han dà il consentiment a las pretensiuns cun suttascriver la brev. «En vista dal curt temp da rimnar las suttascripziuns è il dumber in ferm signal.» *Viola Cadruvi* ha menziunà pliras dunnas che hajan ditg da bain sustegnair las pretensiun, n'hajan dentant betg vulì e pudì s'exponer per divers motivs.

Betg surstà

Surstà da las reacziuns sin l'elecziun dad in secretari general n'è il president da la Lia Rumantscha, *Johannes Flury* betg, sco quai ch'el ha remartgà sin dumonda. En la brev e la reacziun da bleras dunnas



La Lia Rumantscha ha survegni in ferm signal da dunnas rumantschas.

FOTO LIA RUMANTSCHA

sin quella elecziun vesa *Flury* senz'ater aspects positifs per l'avegnir da la LR. Ina pretensiun da la brev po el sustegnair cumplet. «Il patratg da surdar la batgetta dal presidi da la Lia Rumantscha ad ina dunna è grondius.» Pertutgant l'elecziun dal secretari general ha *Flury* punctuà dad avair communitgà da bell'entschattadad ir a la tschertga da la persuna la pli qualificada. E da desister dad aspects sco derivanza regiunala, idiom, confessiun ubain schlattaina. Ed il president da la Lia Rumantscha è persvadì dad avair eleger cun *Diego Deplazes* la persuna la pli qualificada a disposiziun per il post dal secretari ubain da la secretaria generala. El ha menziunà che la LR n'haja betg simplamain publicità in inserat e tractà las annunzias. «La Lia ha laschà cussegli-

ar dad ina interpresa specialisada per la tschertga da persunal da cader.»

Enconuscha la scena rumantscha

Accompagnà la tschertga dal nov secretari general ubain da la nova secretaria da la Lia Rumantscha ha *André Wirz* da l'interpresa *Amrop*. Ina interpresa tranter ater specialisada da pledentar forzas da lavur adattadas per ina posiziun da cader. *Amrop* accompogna sia clientela dal profil d'exigenza per il post enfin a la tscherna ed anc s'enter, sco ins po leger sin la pagina da l'interpresa. *Wirz* para dad enconuscher l'ambient rumantsch en ed ordaifer il chantun *Grischun* pertutgant talas forzas da lavur. El ha confermà da gia avair surpiglià incumbensas per *RTR*, emprims contacts dateschan da

l'onn 2008. Sin fundament da sias experientschas saja la dumonda da vart da la Lia Rumantscha vegnida per sustegnair la tschertga dad ina secretaria ubain dad in secretari. *André Wirz* ha explitgà ch'in inserat na tanschia betg per chattar persunas qualificadas che possian ademplir il profil d'exigenza definì per in tal post. I basegnia dad ina retschertga per evaluar las persunas adattadas e prontas da star a disposiziun. Il martgà da persunas rumantschas na saja sa chapescha betg uschè grond. I dettia dentant persunas rumantschas en ed ordaifer il chantun che possian senz'ater ademplir las pretensiuns definidas per in post da cader. Betg tuttas persunas contactadas da sia vart sajan dentant disponibilas ubain hajan gust da surpigliar in post offrì, ha *Wirz* explitgà. Il dumber da dunnas e dad umens contactads da sia vart per evaluar l'interess da daventar secretaria ubain secretari general da la Lia Rumantscha n'ha *Wirz* betg vulì tradir. «Quai pertutga memia fitg l'elecziun actuala.»

Tradi in pau dapli

In pau dapli ha *Johannes Flury* tradì. Tuttas dunnas contactadas da *Wirz* n'hajan betg gi interess da daventar secretaria generala da la Lia Rumantscha. «Ina dunna ha tuttina cuntanschì la runda finala da la tscherna.» En quest cas ina dunna ch'era s'annunziada per il post da la secretaria generala. *Viola Cadruvi* na pon ils motivs da la qualificaziun betg persvader. «Là nua ch'ils umens fan la tscherna èn las dunnas disfavourisadas.» Ella ha menziunà l'Associazion dals guides da muntogna che haja finalmain retschavì ina dunna al timun. «Uras che la Lia Rumantscha suonda e tschertga egualitad en ses gremis directivs.»